

02/12/1997

MB Johor tunjuk contoh berjimat

AYER HITAM, Isnin - Menteri Besar, Datuk Abdul Ghani Othman, memulakan teladan berjimat cermat di kalangan pemimpin negeri ini apabila memilih utara tanah air sebagai destinasi percutiannya mulai Khamis ini.

Bagi tempoh dua minggu lebih itu, beliau dan keluarganya akan bercuti di beberapa destinasi di utara termasuk menikmati keindahan pulau peranginan di sana.

Sehubungan itu, Abdul Ghani menyarankan pemimpin kerajaan, parti politik dan rakyat negeri ini memilih keindahan pulau peranginan sebagai destinasi percutian dalam menjayakan langkah berjimat cermat.

"Sebenarnya, banyak tempat menarik di negara kita yang boleh dilawati dan saya sendiri akan bercuti di pulau peranginan dan beberapa destinasi menarik di utara tanah air.

"Tidak perlu kita menghabiskan duit untuk membawa keluarga bercuti di luar negara sedangkan banyak destinasi pelancongan tempatan mempunyai keindahan setanding," katanya katanya, ketika ditemui di Institut Pertanian Ayer Hitam, di sini.

Beliau berkata, antara destinasi percutian yang boleh memberikan kepuasan ialah pulau peranginan yang berterabur di merata tempat di kawasan perairan negara ini.

Menurutnya, nasihat Perdana Menteri, Datuk Seri Dr Mahathir Mohamad seharusnya difahami oleh ahli parti tanpa perlu ada arahan hitam putih mengenainya.

"Perkara ini (bercuti dalam negara) saya anggap boleh difahami sendiri oleh pemimpin parti di semua peringkat dan tidak perlu diperjelaskan lagi," katanya.

Abdul Ghani berkata, keputusannya bercuti dalam negara juga boleh dianggap saranan secara tidak langsung kepada pemimpin lain di negeri ini untuk mengambil tindakan sama.

Pucuk pimpinan Umno baru-baru ini meminta pemimpin parti itu di semua peringkat supaya tidak mengambil cuti ke luar negara bagi menyokong langkah pemulihan ekonomi.

Perkara itu diputuskan pada mesyuarat khas Majlis Tertinggi (MT) Umno atas nasihat Presiden parti sebagai langkah penjimatan yang dilaksanakan kerajaan berikutan keadaan ekonomi negara sekarang.

(END)